

Gvangjsih Minzczu Bau

Cawjguenj: Gvangjsih Bouxcuengh Swcigih Minzczu Cunghgyau Swvu Veijyenzei

Cawjbanh: Gvangjsih Minzczu Bause

Geiz neix 8 banj

广西民族报 Aenhauh okbanj: CN45-0036

B.2025

Nd.7 Ng.16

Liggaeuq ietceih nienz ndwenloeg ngeihngeih Geizsoq: Gungh daih 3677 geiz

120 Boux Lauxhangz Doxcomz Bwzswz Yaenglwnh Ceihleix Henzguk Caeuq Yendaiva Yiengh Cungguk

7 nyied 12 hauh, aen hoih yaenglwnh yozsuz “ceihleix henzguk caeuq yendaiva yiengh Cungguk” youq Bwzswz Yozyen guh. 120 boux lauxhangz Cungguk Sevei Gohyozyen, Cungguk Yinzminz Dayoz daengj lai aen gauhyau doxcomz giz ndeu, hopheux ceihleix henzguk caeuq yendaiva yiengh Cungguk bae yaenglwnh.

Ngoenzhaenx, gyoengq lauxhangz youq gwnz hoih gangjavah doxyaeng,

mboujdan miz daj dangsij dangjen, minzczu lijlan, fapceih hwnqguh doenghgi dieg neix bae lwnh ceihleix henzguk, youh miz damqra gih raeuz couqmaenh gij eiqsik Cunghvaz Minzczu ranz vunz ndeu, shwcwng gyauyuz yungzhaeuz saedguh ceihleix caeuq daezlien gij gingniemh ceihleix dieg henzguk Neimungzguj, Sinhgyangh, Gizlinz doenghgi dieg neix dem.

Gyoengq boux lauxhangz

caeuqfaenh haihoih nyinhnaeuz, henzguk hoenghvuengh dwg aengiek youqgaenj guekgua hwnqvuengh, guekgua hung’ ak dwg gij baujcanz gaenbonj henzguk andingh. Mwh doinyoengx yendaiva yiengh Cungguk baenaj, ceihleix henzguk aeu gaemmaenh aen yenzcwz “caezcaemh doxgiet buekguh, caezcaemh mwnhoengh hwnqfat”, mboujdan cukmaenh fajciengz ancienz guekgua, hix aeu hawj gij doekbyai guhhoengh

laujih doengrad bae, guhbaenz dieg henzguk ciengzgeiz onjdingh caeuq hwnqfat ndei saed.

Baez hoih yaenglwnh neix dwg Swcigih Dangjvej Dangsij Yenzgiusiz, Bwzswz Yozyen, Cungguk Yinzminz Dayoz Cunghgung Dangsij Dangjen Yozyen, Vaznanz Swfhan Dayoz Cunghgung Dangsij Dangjen Yenzgiuyen doxcaez cawjbanh.

(daj 《Gvangjsih Yizbau》 aeu daeuj genj hoiz Vuj Yungjci)

Heiqgvangjsih 《Najvunz Vadauz》 Youq Veizyejnaz Oknaj

2025 “mboengq yienjok heiq Cungguk” nem yienghsaeh baenzroix yienj heiq Cungguk 12 hauh banhaemh youq Audili soujduh Veizyejnaz haiciengz.

Heiqgvangjsih 《Najvunz Vadauz》 Gvangjsih Bouxcuengh Swcigih daiq daeuj haenx youq Veizyejnaz Mudwz Giyen yienj, yienj ciengz heiq miz vwnzva daegsaek baihoeng ndeu hawj bouxyawj.

《Najvunz Vadauz》 baez neix yienj, lwnhgangj le gij cingz doxgyaez hawj vunz gamjdoengh boux doegsaw daihgeq caeuq dahsau Du Yizcunh. Ndaw heiq “raiz sei gwnz dou” “hoenz dauq ndoengdauz” doenghgi ciengzgingj neix, aeu gij eiqqingq seiswz daihgeq cienjvaq baenz heiq yienj okdaej. Mwh yienj sat, daengx ciengz dopfwngz huhu.

Haujlai bouxyawj guk rog

naeuz, caenhguenj vah mbouj doengz, hoeng yawj bouxyienj din fwngz yienj okdaej caeuq ciengz go, gyoengqde hix yinx ciengz heiq neix, deng gij gojgaeq doxgyaez baihoeng neix gamjdoengh laeglaeg bae.

Gvangjsih Bouxcuengh Swcigih lij yaek bae Yidali Gwzleizmoznaez yienj 《Najvunz Vadauz》.

Baez yienghsaeh neix dwg Cungguk Gohgi Yenzgiuvei caeuq (Ouhcouh) Gozci Vwnzva Gyauhliuz Hozcoz Hezvei cawjbanh, Vwnzva Caeuq Lijyouz Bu Yisuz Fazcanj Cunghsinh ciepbanh, yaek youq 2025 nienz yienj Gunhgiz, Geiqgvangjdungh, Cinzgyangh, Heiqgvangjsih daengj bet yiengh heiq hawj bouxyawj yawj.

(daj Sinhvazvangj aeu daeuj genj hoiz Mung Fanzij Yiz Dauh)



Vuzcouh: Seizndat Doenghnaz Gyaeugetget

7 nyied 12 hauh, youq Vuzcouh Si Dwngzyen Dwngzcouh Cin Danzdungh Cunh, doenghnaz gvangqlangh, gaiqnaz biz, lajmbanj gyaeundei doxgap baenz fuk vel gyaeundei heuyauyan ndei.

(Yenz Gveihaij ingj)

Gvangjsih Gaiq Daihcibseiq Hagseng Yindungvei Haimuq

7 nyied 11 hauh banhaemh, Gvangjsih Gaiq Daihcibseiq Hagseng Yindungvei youq Gvangjsih Gohgi Swfhan Yozyen haimuq. Gaiq hagseng yindungvei neix dwg Swcigih Gyauyuzdingh, Swcigih Dijyuzgiz caeuq Gunghcinghdonz Gvangjsih Gihvej doxcaez cawjbanh, dwg aen hoihhoengh diyzuz cunghab daengx gih hagseng caeuqfaenh lailang.

Gaiq doxdax neix dwg baez genjniemh hong diyzuz hagdangz daengx gih ndeu, hix dwg baez gyoengq doengzhag langhbaij ndang cangq, bonjsaeh doxdax caeuq yienghsienq cingsaenz ndeu. Mwh haimuq langhbaij ciengz heiq vwnzdij ndeu, ca mbouj lai 900 lai boux hagseng caez dwkgienz, guh dijcauh caeuq diuq fouxgyongnaezhenj,

langhbaij swncienz minzczu vwnzva, lai minzczu doxgiet buekguh caeuq gij gyaeundei swnghdai baihcungqgyang Gvangjsih okdaej hawj bouxyawj yawj.

Ciuq cam rox, doxdax gungh miz 11 aen hangh hung, 305 aen hangh iq, youz Gvangjsih Gohgi Swfhan Yozyen daengj 16 aen danhvei ciepbanh. Miz daengx gih 14 aen si laeb gih, 81 aen

gauhyau caeuq 25 aen gihciz cungdaengj cizyez hagdangz bauqmingz camgya, yindungyenz, gyaulyenz, bouxgagnyienh doengh gij vunz neix mauhgvaq 2 fanh boux, soq aen danhvei camgya doxdax caeuq soq vunz camgya doxdax cungj beij gaxgonq lai.

(daj 《Gvangjsih Yizbau》 aeu daeuj hoiz Cinz Yuzyenz)